



Atuartut allagaat Læserbrev

Kapisillit naligiissitaanerlu

Nunatsinni aalisarnerput sanillersuunneqarsinnaanani nunatsinni inuussutissarsiutitta annersaraat. Tassani nunatta innuttaasa ilarpassui suliffeqarput, nunattalu isertitaasa amerlanerpaartai tassani isertinneqartarput. Taamaallilluni aalisarnerup nunatsinni inissisimanera sunniutaalu sakkortuvoq.

Pissaanerup inissisimanera innuttaasunut tamatigut ersarissuusangilaq, innuttaasummi ilaat amerlasuut inimit pissaaneqarfiusumut isersinnaanngimmata tamatuma unammillernissaa ajornakusoorpoq. Init pissaaneqarfiit matoqqavallaarlutillu assigiiaarpallaarpata, alapernaassuseq ineriartornerlu unittartut isumaqarpunga. Taamaammat inimi pissaaneqarfimmi taarseraattarnissaq assigiinngiaartuunissarlu pingaaruteqarpoq. Assigiinngiaassuseq tassaavoq inimi pissaaneqarfimmi eqimattat assigiinngitsut najuunnissaat. Tassaniissapput nukiit utoqqaat nukiillu inuusunnerusut, angutit arnallu, inuit inuuniarnikkut, kulturikkut ilinniarsimassutsikkullu assigiinngitsunik tunuliaqutaqartut, inuillu assigiinngitsunik isumaqartut.

Ukiuni qulikkaani kingullerni inini siulersuisoqarfinni, pisortaaneqarfinni politikimilu assigiinngiaartuunermik ineriartorneq takusinnaavarput. Peqarpugulli puigugaasumik, ineriartornerup kigaatsuararsuarmik ingerlavigisaanik, tassalu aalisarnermi. Nunani avannarlerni misissuineramik saqqummeqqammisumi [‘Kapisillit Naligiissitaanerlu’](#) ilaatigut arnat ‘aalisakkanik suliffissuaqarneq’ tamakkerlugu peqataanerisa pingaarluinnartuunera inerniliunneqarpoq. Taakkuli inissisimanerat ilapittuutaallu amerlasuutigut akuerineqarneq ajorput, tamannalu tamakkiisumik naapertuilluartumillu peqataasinnaanerat sunnertarpaa.

Inoqarpoq ajoraluartumik aalisarnerup angutitut suliffiuneranik sulii isumaqartunik. Tamanna atuuppoq naak imarsiornermi ilisimatusarnerup nutarsaanerullu iluani arnat amerliartornerannik takussutissaqaraluatoq. Inuussutissarsiutillu inuiaqatigiinni taamak pingaaruteqartigalunilu nunatta ineriartornerani pingaarutilimmik inissisimanerani tamanna ajornartorsiutaavoq. Arnat pillugit eqqarsariartaasitoqqat isumatoqqallu taakku allatut ajornartumik suujunnaarsittariaqarpavut. Taamatullu pisoqarnissaanut arlalinnit suliiuniteqarnissaq pisariaqarpoq.

Marlussuit pisariaqartinneqarput. Siullertut inuussutissarsiortut suliffinnik arnanut pilerinarnersitsinissamut ullumikkornit pikkorinnerujussuusariaqarput. Aappaattut arnat sulii amerlanerit suliffinnut ilinniartitaanernullu aalisarnermut iluaqutsiisunut iserniartariaqarput. Taama oqaannarnissaq soorunami

Sagsnr. 2024 - 1258
Dok. Nr.
Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: asn@nanoq.gl
www.naalakkersuisut.gl

ajornanngitsuaraavoq, tamannali pissappat politikikkut soqutiginninnissaq suliniuteqarnissarlut pisariaqarput.

Naalakkersuisutut inuussutissarsiornermut naligiissitaanermullu immikkoortunik akisussaasutut suliffeqarfiit assigiinngitsut umiartortunik sulisoqartut pulaartarpakka. Ilaat aalisakkanik suliaqarput, allallu niuermik ilaasunilluunniit angallassinermik suliaqarput. Ataatsimut isigalugu arnat ullumikkut imarsiornermi suliffeqarnatik nunami suliffeqarput. Arnat umiartornerup silarsuaani suliffeqartut saqisutut umiarsuarmilu assistentinut suliffeqarnerupput. Inili pissaaneqarfik allanngortissagutsigu arnat amerlanerusut aquttut, maskinmesteritut pisortaaneqarfinnullu isertittariaqarpavut. Ingerlatseqatigiiffillu initatigut sinaakkutit soorlu atisaajartarfiit kisiimiinnissamullu periarfissaqarnerit aamma isummersorfigisariaqarpaat. Inuussutissarsiortuni oqaloriaatsit allanngortinnissaat pisariaqarsinnaavoq – tamanna arnat kisiisa eqqarsaatiginagit aamma. Oqaloriaatsip sakkortuallaap arnat kisiisa isitsaalinngilaat, aammali angutit ilaat isitsaalivaat. Ullumikkullu aamma inuusuttut akornanni peqatigeeriaaseq naleqartitallu allaapput, tamannalu aamma pimoorullugu tigusariaqarparput.

Umiarsuarnissaq paarlaattarnerit arnat inuusunnerusullu suliffinnik pilerginninnerannut sunniuteqarput. Ullumikkut ilaqutariittut inuunerup ingerlalluarnera annertunerusumik aallunneqarpoq, qaammatinilu arlalinni sivilissusilikkaarumik paarlaattarnerit ilaqutariinnermi inuermik ataqatigiissitsiniarnissami ajornakusoortitsisinaapput.

Sulisunut tunngaviusumik sinaakkutit qissiminngikkutsigit siunissami angutunik arnanillu sulilersitsiniarnissap ajornartorujussuunissaa takorloorsinnaavara, ikinnerugaluttuinnartummi sapaatip akunnerisa naaneranni unnukkullu sivilissumillu ilaquttat qimallugit suliffiusartuni sulerusuttut ikiliartorput. Inuussutissarsiortut soorunami isertitaqarnissartik imminullu akilersinnaasumik aalisarnissartik aalluttussaavaat. Umiartortuunermi inuusaasiuvoq, taamaammallu kikkunnut tamanut naleqquttuunani. Sinaakkutillu atugassarititaasullu iluanni immaqa allanngornissamut periarfissaqarpoq. Pivusoq qimarratigisinnaanngilarput, atorfiillu inuttalerniartarnerat sulit ajornarneruleriartorpat aqutit nutaat misilerartariaqarpavut.

Naggasiullugu ingerlatseqatigiiffinnut suliffeqarfimmi iluanni naligiissitaanermut politikiminnik, isumannaatsuutitsinerminnik sulisumillu atorfeqarnerminni atorfinnik assigiinngitsunik misilittaanissaannik periarfissiinissamik aallussinerunissaat kaammattuutigissavara.

Nunatta innuttaasa imaani atorfinnik tamanik tigusinissaat angussagutsigu, tamanna siunnerfeqarluartumik sulissutigisariaqarparput. Ullumikkornit allaanerusumik annertunerusumillu iliuuseqarusussuseqartariaqarpugut.